

Il est probable qu'i y avait tchique sorte dé fortificatiaon qui dominait la crique éiouque lé havre dé Saint Samsaon dev'lopit pus tard. Durànt lé Moyen Age, la caoute là fournissait d'l'abri pour les batchaux qu'i n'pouvaient pas en trouvaïr lé laong d'la seule cauchie à Saint Pierre Port. I protégeait étout lé Grànd Paont qu'était lé llien ente lé Cllaos du Valle dauve lé restànt dé l'île.

Comme ailleurs en Guernési, i y avait enne tour sus l'haout d'la hougue qui fut bâti durànt la Guerre d'Indépendànce en Amérique. Pus tard des pllatformes et murs furent bâtis et au c'mench'ment du dix-neufième siècle i y avait quate conaons là. Lé naom du Gouvernaeux Sir John Doyle est coupllaï dauve chute tour comme dauve d'aoutes forts dans l'île. Ch'tait li qui organisit la défense dé Guernési durànt chu temps dé guerre. En 1867 quànd i y aeut du brou ente France et Anglleterre, chu fort était derchier important pour la défense dé l'île.

Tout chena finissit quànd l's Etats l'acatirent d'la Couraonne pour £600 en 1899. Durànt la droine djère, les All'mands lé renforchirent dauve des criniaux en chiment qui lé faont paràite raide laid. En 1984 lé Département pour les Travaux Publics r'parirent lé terroin dé ranches et saercle autour du viar bâtiment. I mirent des dégrais en granit dauve aën ch'min et des bāncs pour qué les gens peuvent s'assiér et admirair la belle vaeux enviars Herme et les aoutes îles. Pus tard i fut fait servi par les Sea Scouts.